

Sonhag Sawcuengh Daegsaek Noengz

壮语文教学特色浓

——Geiq Gij Hongsaeh Binhyangz Yen Couhhih Cin Bwzsanh Siujyoz Sonhag Cuengh Gun Song Saw Vah

□bonjbauq gicej Dangz Lungz Vangz Hauyinz



▲ Gyoengq hagseng comz-rengz haeujsim doeg Sawcuengh.

▲ Bi 2015, aen hozdung daengx yienh doxdax hwnj dangz goq Cuengh Gun song saw vah youq neix gawjbanh.

◀ Bi 2014, Swcigih Gyauyuz-dingh Minzczuz Gyauyuzcu cucangj Veiz Lanzmingz daengz neix camgya "sam nyied sam" hozdung.



▲ Gyoengq nyez caez ciengq go Vahcuengh.

Binhyangz Yen Couhhih Cin Bwzsanh Siujyoz 1958 nienz laeb, aen hagdangz neix seizneix miz it daengz roek nienzgaep, roek aen ban, 272 boux hagseng, 15 boux lauxsae. Doenghboux hagseng dingzlai dwg vunz Bouxcuengh、Yauzczuz. 1984 nienz aen hagdangz neix ndaej dingh guh Cuengh Gun song saw vah saedniemh siujyoz, 2014 nienz ndaej dingh guh minzczuz vwnzva gyauyuz sifan hagdangz. Lai bi daeuj, aen hagdangz neix doenggvaq sonhag Sawcuengh, hawj banhhag daegsaek noengzna.

Aen hagdangz neix dingh son-gyauq gocwnz dangdieg, roengzrengz sonhag Sawcuengh, hawj hagseng roxyiuj vwnzva Bouxcuengh, hag saw Bouxcuengh. Youq guh sonhag seizde, caemhcaiq sonhag vah saw、yinhyoz、foux nem dijjuz minzczuz.

Aen hagdangz neix bien le sawson dangdieg, dangz vah saw minzczuz aeu Vahcuengh biucinj hwnj, hawj hagseng rox aeu Vahcuengh ciengqgo、doeg sei、gangj gojgaeq、fanhoiz daengj; dangz foux minzczuz son hagseng moix aen haggeiz aeu rox song cungj foux minzczuz; dangz yinhyoz minzczuz son' gyauq hagseng rox ciengq 《Fwen Couxhek》《Fwen Gingqlaeuj Bouxcuengh》 doengh diuzgo Bouxcuengh. Linghvaih, aen hagdangz neix haenqrengz guh minzczuz conzduengj dijjuz, miz foux-faexsax、haizgiegraez、bau aen-domq、dik lwggienq、ringx gengxdiet、diuqcag. Daj 2009 nienz daeuj, aen hagdangz neix genhciz moix bi banh baez saujsu minzczuz yindungvei ndeu, yinx hagseng gyaezmaij dijjuz minzczuz, lai rox dijjuz minzczuz.

Moix bi daengz liggaeuq sam nyied sam, aen hagdangz neix dawz

ngoenzciet Bouxcuengh dingh guh aen ciet baijok vwnzva minzczuz. Daj 2009 nienz daeuj, moix bi guh baez vwnzyi comzyienj ndeu, dazyinx hagseng gyaezmaij gofoux minzczuz, swjcieenz vwnzva minzczuz.

Aen hagdangz neix moix bi cungj guh Cuengh Gun song saw vah gyauyenz hozdung, ndawde miz doxdax aeu Vahcuengh biucinj gangj gojgaeq, doxdax hwnj dangz goq Sawcuengh maenhndei daengj, yaugoj cungj ndei.

Aen hagdangz neix lij roengz-rengz comz lauxsae camgya dangz goq Sawcuengh beizyin, gij beizyin neix youz Swcigih Gyauyuzdingh、Nanzningz Si Gyauyuzgiz cawjbanh. Neix hawj lauxsae daezsang suijbingz sonhag Sawcuengh, daezsang Sawcuengh sonhag cizlieng.

Aen hagdangz neix sonhag saw vah minzczuz aeundaej cingzcik ndei. Daj 1984 nienz sonhag Cuengh Gun song saw vah daeuj, vih cunghyoz nem sevei beizyangj geij cien boux hagseng saujsu minzczuz; daj 1990 nienz daeuj, gaenq miz 600 lai boux hagseng saujsu minzczuz gauj hwnj minzczuz cunghyoz. 2010 nienz 12 nyied, boux lauxsae Lingz Li daibyauij Binhyangz Yen camgya daengx gih

lauxsae Cuengh Gun song vah doxdax gangj gojgaeq, ndaej ngeihdaengciengj. 2012 nienz、2013 nienz aen hagdangz neix camgya Vahcuengh Sawcuengh Suijbingz Gaujsi, miz 6 boux ndaej gaugaep ngeihdaengj, boux ndeu ndaej cogaep ngeihdaengj. 2014 nienz 12 nyied, boux lauxsae Lingz Li youq gwnz hozdung daengx gih aeu Vahcuengh biucinj gangj gojgaeq daihhoih dang bouxcujciz.

Aen hagdangz neix sonhag minzczuz vwnzyi cingzcik hix ndei. 2009 nienz 12 nyied, hagseng Hoz Yinghniz daibyauij Binhyangz Yen camgya daih'it gaiq daengx gih siujhagseng doxdax gangj gojgaeq Vahcuengh, ndaej samdaengjciengj. 2011 nienz 12 nyied, hagseng Veiz Ginhcui daibyauij Binhyangz Yen camgya daihngieih gaiq daengx gih siujhagseng doxdax gangj gojgaeq Vahcuengh, ndaej samdaengjciengj. 2012 nienz 12 nyied, hagseng Hoz Yingzcai daengj daibyauij Binhyangz Yen camgya daengx gih siujhagseng Vahcuengh caizyi byaujyenj, ndaej samdaengjciengj. 2014 nienz 12 nyied, hagseng Lingz Yijsinh daibyauij Binhyangz Yen camgya hozdung doxdax aeu Vahcuengh biucinj gangj gojgaeq, ndaej samdaengjciengj.



▲ Hagseng camgya saujsu minzczuz yindungvei ndaej ciengj.



▲ Gij banj baijok vwnzva minzczuz hix miz daegsaek.



▲ Lauxsae vix fwngz dazyinx lwgnyez hag singdiuh Sawcuengh.



▲ Aen hagdangz neix vwnz-yidui daenj ndangdaenj minzczuz, yienghsiengq ndeyawj.



▲ Hagseng mwh roengzdangz maij diuq fouxfaexsax.